

Noticia
Transparente
di Gobierno

ISLA ONLINE

Diamars 24 September 2024

Email: IslaOnline@gobierno.aw Tel: 528-4952



**STABILIDAD
Y
PROSPERIDAD**
2 0 2 4

Gabinete Wever-Croes



Den conexion cu e reunion cu Presidente Santhoki di Suriname **ARUBA Y SURINAME LO ESTRECHA LASONAN COMERCIAL, ECONOMICO Y CULTURAL**



Durante su bishita na New York pa e Summit of the Future, Prome Minister Evelyn Wever-Croes hunto cu Prome Minister di Sint Maarten señor Luc Mercelina a reuni cu e Presidente di Suriname, señor Chan Santhoki. Prome Minister a indica cu President Santhoki ta sumamente entusiasmo cu su bishita na Aruba dia 21 di October proximo.

Durante su bishita na Aruba, President Santhoki lo lo tin varios reunion cu Ministernan di Gabinete, miembronan di Parlamento y Gobernador di Aruba. El lo bishita e Diaspora di Suriname, cu ta e comunidad grandi di Suriname cu tin na Aruba y tambe varios otro proyecto.

Prome Minister a indica cu Aruba ya pa 2 aña tin un relacion estrecho cu Suriname, mirando cu hunto cu Minister di Economia Geoffrey Wever a reuni cu e presidente den pasado,

y a papia di su proximo bishita na Aruba.

Suriname ta un pais cu por yuda Aruba hopi riba aspecto di agricultura, pero tambe di importacion di fruta, berdura y otro productonan cu nan por exporta. Aruba ta buscando partnernan nobo pa importa productonan na prijs mas abou, mirando cu esaki lo yuda baha e costo di bida.

"Mi mester bisa cu e reunion na New York tabata uno positivo na unda a papia riba estrecha e lasonan comercial, economico y cultural entre Aruba y Suriname. Durante su bishita proximo na Aruba, Presidente Santhoki y mi persona lo firma un MOU, na unda lo tin palabracionnan entre Aruba y Suriname pa tin mas colaboracion pa cu lasonan comercial y economico" Prome Minister a expresa.

Na Nacionnan Uni

PROME MINISTER HUNTO CU MINISTER PRESIDENT DI JAMAICA A ORGANISA UN CONFERENCIA TOCANTE E IMPORTANCIA DI E ROL DI HOBENNAN DEN FUTURO

"Hunto nos lo traha pa un mundo mas sostenibel, husto y resiliente enfoca riba e futuro generacion"



Na Nacionnan Uni, durante e Summit of the Future, Prome Minister Evelyn Wever-Croes representando Aruba y Reino Hulandes, hunto cu Minister President di Jamaica, Andrew Holness a organisa un conferencia (side-event) tocante e importancia di e rol di hobennan den futuro. E conferencia tawata basa riba "Declaration on Future Generations", cu ta un declaracion cu ta explora solucionnan pa salvaguardia e necesidadnan di futuro generacionnan riba temanan di demografia, clima y desaroyo.

Prome Minister durante su discurso a indica cu tin pais cu ainda ta recuperando di e crisis di e pandemia y otro nan ta bibando momentonan di conflicto y guerra. Ultimo añanan mundo a bira mas peligroso y impredecibel. Pero tambe cada crisis por ta un oportunidad pa bin cu cambionan, y e Declaration on Future Generations y Summit of the Future por haci esaki. Awor ta e momento cu e comunidad global por dicidi di tuma accionnan diferente.

Tambe Prome Minister a menciona cu e declaracion no solamente ta enfatisa e manera cu tur e retonan cu paisnan ta enfrenta ta interconecta, manera cambio climatico y e desigualdad creciente den e sociedad, pero tambe pa cambia e 'status quo', y asina muestra solidaridad cu cada generacion, y pa tuma responsabilidad pa e bienestar di esnan cu ta bin despues di nos.

Pa paisnan chikito, manera e islanan Aruba, Corsow y Sint Maarten, e declaracion aki ta sumamente importante. Cambio climatico por afecta e tres islanan chikito considerablemente. Un horcan fuerte por afecta un famia pa generacionnan, pero Prome Minister a menciona di ta keda optimista pasobra ora Declaration on Future Generations bay den accion, esaki lo



conduci na miho coordinacion y resultadonan real.

Prome Minister:

"Mayan e Declaration on Future Generations lo wordo anexa na e Pact for the Future y e Global Digital Compact. Durante e side event nos lo wak mas di cerca con pa converti e declaracion den accionnan practico y cua pasonan pa tuma prome. Gobiernonan tin e responsabilidad primario pa salvaguardia e necesidadnan y interesnan di e futuro generacion, y e enfoque di e conferencia ta riba e pasonan concreto y accionnan cu paisnan miembro mester tuma pa cu e implementacion completo di e declaracion.

Nos ta pidi gobiernonan, sociedad civil y otro stakeholders pa traha hunto y converti compromisonan den resultadonan real. Hunto nos lo traha pa un mundo mas sostenibel, husto y resiliente enfocando riba e futuro generacion".

Prome Minister Evelyn Wever-Croes:

REUNION IMPORTANTE ENTRE PROME MINISTER Y STATE DEPARTMENT MERICANO NA NEW YORK



Durante e biahe di Prome Minister Evelyn Wever-Croes na New York, e mandatario a atende varios reunion. Un reunion di hopi importancia tawata cu Michele Sison cu ta e United States Assistant Secretary of State for International Organization Affairs. Merca ta un partner hopi importante den relacionnan comercial pa Aruba y p'esey e relacion di Gobierno di Aruba cu State Department Mericano ta hopi estrecho.

U.S. Customs and Border Protection

Durante e reunion a papia riba diferente tema. Un di nan ta di e presencia na Aruba di U.S. Customs and Border Protection, CBP cu ta e Imigracion y Douane Mericano cu pasaheronan ta pasa ora biaha pa Merca, e asina yama "Preclearance". Esaki ta un tratado importante cu Aruba cu Merca tin y Aruba ta e unico pais pafo di Merca cu tin e tratado aki. Actualmente Aruba ta den un re-negosacion cu Merca di e tratado pa asina amplia e capacidad di CBP na Aruba mirando e cantidad adicional di turista di Merca cu ta bishitando Aruba. E negosacion ta na e fase final y ta spera pronto por formalisa esaki.

Trafficking in Persons (TIP) Report

Otro tema hopi relevante cu a trata cu State Department ta e tema di trafico y trato di persona. Aruba ta wordo evalua door di Merca cada aña y ta wordo raporta den e Trafficking in Persons (TIP) Report. Te na e momento aki Aruba a mantene tier 2 den e report cu ta bon y miho compara cu Corsow y Sint

Maarten. Pero no obstante di esaki Aruba ta trahando hopi duro pa bay tier 1. Mientras e situacion humanitario na Venezuela keda manera cu e ta, semper Merca lo keda huzga Aruba cu un wowo extra streng mirando kico Aruba ta haciendo pa evita trafico y trato di persona. P'esey Gobierno di Aruba ta trata e tema aki cu man duro pa castiga e hendenan cu ta comete e tipo di ilegalidad aki.

Situacion politico na Venezuela

Tambe a elabora durante e reunion riba e situacion politico na Venezuela y kico ta spera despues di e eleccion presidencial, basa riba e echo cu Nicolas Maduro no ta publica e actanan di eleccion. Riba esaki Merca a indica cu nan a anuncia caba y ta keda para riba e echo cu mester bin mas transparencia den e situacion, y Merca ta sigui observa e desaroyonan na Venezuela di cerca. Tambe Prome Minister a trece padilanti e echo di e efectonan cu e situacion na Venezuela tin pa Aruba door di e cercania cu e isla y e situacion di e pais bisiña ta un preocupacion grandi pa e Aruba.

Prome Minister a indica cu a trata di un reunion exitoso unda a subraya e importancia cu Merca tin como un partner strategico pa Aruba. Durante e reunion tambe a trata diferente otro temanan manera seguridad, oportunidadnan comercial y studiantenan Arubiano na Merca. ■■■



DEN NOTA DI FIN DI AÑA 2024 TA INFORMA PARLAMENTO RIBA E CAMBIONAN CU TA NECESARIO PA POR ALOCA FONDO PA EHECUTA PROYECTONAN DI LANDSPAKKET CU TA YUDA MEHORA E MANEHO FINANCIERO DI ARUBA

Ta trata e proyectonan di E-LOFA, 3 Lines of Defense y Verslaggevingsstelsel



Minister Maduro di Finansa a presenta e Nota di Fin di Aña 2024 na Parlamento di Aruba den cual e Parlamentarionan ta wordo informa riba e cambionan cu ta wordo prepara den e segundo Presupuesto Supletorio 2024 cu pronto lo wordo presenta na Parlamento pa su aprobacion. Den e Nota por mira tambe e cambionan cu ta necesario pa aloca e fondonan pa proyectonan den cuadro di implementacion di e Landspakket.

Pa locual ta e cartera di finansa Minister Maduro ta informa cu fondonan ta wordo aloca pa realiza proyectonan den cuadro di Thema A Landspakket cu ta trata e mehoracion di e maneho financiero di Aruba. Den esaki tin e E-LOFA cu ta e curso digital di Leergang Openbare Financiën cu lo yuda na capacita y engrandece e conocimiento di finansa publico di e trahadornan financiero di Gobierno di Aruba. Banda di esaki tin e proyecto di '3 Lines of Defense' cu ta un proyecto grandi den cual e procesonan y administracion financiero di Gobierno ta wordo optimalisa. Tambe tin e proyecto di 'verslaggevingsstelsel' cu ta un otro proyecto grandi cu mester hiba na certificacion door di un accountant externo di e Cuenta Anual di Pais Aruba di aña 2026.

Minister Maduro di Finansa ta enfatisa cu e proyectonan aki ta hopi importante pa e mehoracion di finansa publico di Aruba. E proyectonan di '3 Lines of Defense' y 'Verslaggevingsstelsel' ta proyectonan grandi cu ta tuma tempo, ta costa placa y ta exige basta capacidad pa asina por keda ehecuta. Den pasado, por ehempel, na Hulanda mes a dura mas di 20 aña pa caba di implementa e mehoracion nan necesario den e proyecto 'Operatie Comptabel Bestel' pa yega na jaarrekening certifica door di accountants externo. "Na Aruba nos ta haciendo un trabou grandi pa den un periodo di apenas 3 aña por yega na un certificacion special di accountant externo. Nos a tuma e curashi pa inicia e proceso y realiza trabounan pa mehora e maneho financiero di Aruba. Den e añanan nos dilanti, Aruba lo mira nan resultado concreto," tabata palabranan expresa pa Minister Maduro di Finansa cu ta splica e importancia y magnitud di e proyectonan aki cu e mandatario ta lidera na bienestar di Pais Aruba. ■■■





MINISTER

Geoffrey Wever

Minister Geoffrey Wever na SNBA: E PROJECTO PA REVITALISA E CENTRO DI SAN NICOLAS TA KEDA PRIORIDAD



San Nicolas Business Association (SNBA), a tene un reunion cu Minister di Asuntonan Economico, Geoffrey Wever, pa discuti e siguiente pasonan pa cu Plan di Revitalisacion di San Nicolas fase 1. Fase inicial aki cu a keda presenta dia 2 di September ultimo durante un conferencia di prensa pa Minister Wever y Minister Arends, pa un suma di 4.3 milyon Florin y ta inclui un serie di proyectonan destina pa renoba, activa y conecta mainstreet pariba y pabou.

Entre e proyectonan por menciona, renobacion di stacion di bus, expansion di acera, inversion den mas iluminacion, vegetacion y areanan pa recreacion, como tambe e construccion di un "Farmer's Market" y un speeltuyn grandi pa nos muchanan. E enfoko di e plan di revitalisacion ta pa duna un impulso nobo na e area historico di San Nicolas, un districto sumamente importante pa e futuro economico di Aruba y pa atrae mas hende pa e centro di San Nicolas.

Minister Wever a indica cu e plan aki ta fundamental pa lansa San Nicolas bou di un atencion turistico y economico renoba, y cu esaki lo por duna beneficio tanto pa e empresarionan local como tambe e comunidad.

Loke a cuminsa mas cu 2 aña pasa cu e "Yes Summit San Nicolas" a crece den un plan visionario pa trece mas negoshi, turismo, y bida social pa e comunidad pariba di brug y haci'e un cas permanente pa nos productornan local. E revitalisacion aki tambe lo aporta na mantene identidad di historia y cultura di San Nicolas cu awor ta wordo considera un hub cultural Caribense, rico na autenticidad y creatividad tambe.

"Na e momento aki, lo sigui haci e maximo un esfuerzo pa mira e inicio di e Plan di Revitalisacion di pariba bira un realidad. San Nicolas merece esaki", asina Minister Geoffrey Wever a expresa durante e reunion cu SNBA. ■■■

MINISTER GEOFFREY WEVER A DUNA PRESENTACION DI SDG'S NA ALUMNONAN DI ST. PAULUS SCHOOL



E siman aki, alumnonan di klassen 6 di St. Paulus School a ricibi un presentacion tokante e metanan di desaroyo sostenibel, e 'Sustainable Development Goals (SDGs)', duna door di Minister Geoffrey Wever. E cabesante di St. Paulus School, señor Randy Arends, a duna un caluroso bon bini na Minister Geoffrey Wever y a splica e practicanan sostenibel cu e scol ya ta implementando, cu ta sirbi como un gran ehempel pa e comunidad escolar.

St. Paulus School ta mostra cu e futuro ta den bon man, danki na e esfuerzonan di alumnonan y maestro pa contribui na desaroyo sostenibel. Di klas 3e pa 6e, ta uzando Chromebooks pa cierto materianan, eliminando e necesidad pa uzo excesivo di papel. Esaki ta un simpel forma cu ta yuda reduci e cantidad di palo di mata cu mester kap, contribuyendo na cuida medio ambiental mundial.

Ademas, e scol tin un hardin di fruta y berdura cu ta siña e alumnonan con pa planta y cosecha, y ta contribui na cuida di tera. Di e hardin aki, ya a cosecha patia, melon, comcomber y dragonfruit – un gran logro pa e scol.

Un otro esfuerzo innovador ta cu e scol ta colecta e awa di e airconan pa usa pa muha e matanan. Actualmente, nan ta colecta mas o menos 40 gallon di awa pa dia, pero por logra hopi mas, y e scol ta trahando pa expande e esfuerzo aki.



Minister Wever a splica na e alumnonan con nos tur por contribui, den manera chikito mes, pa logra e metanan di desaroyo sostenibel pa un Aruba y un mundo miho. Minister Wever a gradici St. Paulus School y señor Randy Arends pa e caluroso bon bini y pa e dialogo fructifero cu e muchanan. Tambe e ta felicita e St. Paulus School pa e esfuerzo extraordinario di e scol na desaroyo sostenibel. "Spera cu nan por sigui inspira e muchanan pa un futuro mas bunita y sostenibel pa Aruba."

E proyecto di Minister Geoffrey Wever pa comparti e metanan di SDG na alumnonan di 6e klas a cuminsa aña pasa, y cu e bishita aki na St. Paulus School, a cubri un total di 22 scol basico. Di un manera interactivo, Minister Wever kier logra inspira e alumnonan cu hopi entusiasmo y speranza pa un futuro mas sostenibel. ■■■

MINISTER GEOFFREY WEVER TA DUNA EMPUHE PA PRODUCCION DI WEBO COMERCIAL



aki. Adicionalmente, World Bank Group den su rapport di 2020 yama, “Building Aruba’s Food Security During the COVID-19 Pandemic and Beyond”, a propone un strategia di seguridad di cuminda pa promove Aruba su produccion local di cuminda y desaroyo economico sostenibel.

Basa riba e rapport nan aki, ministerio di Asuntonan Economico, Comunicacion y Desaroyo Sostenibel a traha un nota di maneho pa subi e produccion comercial di webo di galiña nan Aruba. E sector economico di webo di galiña cu ta wordo referi na dje como un “promising sector”, ta wordo caracteriza pa un dependencia fuerte riba importacion.

Pa incentiva mas actividad economico den e sector di webo di galiña, Gobierno di Aruba ta duna prioridad pa stimula e produccion comercial di esaki. Segun Minister Geoffrey Wever, esaki lo yuda baha e importacion cu lo resulta den menos dependencia di mercado internacional y mas seguridad di cuminda. Pronto lo anuncia e prome accion di e maneho pa stimula e produccion comercial di webo di galiña. ■

Recientemente, riba peticion di Minister Geoffrey Wever conseho di minister a duna aprobacion pa instala un grupo di trabao cu lo enfoca riba e aumento di e produccion comercial di webo di galiña na Aruba. E ‘werkgroep’ aki ta consisti di Departamento di Asuntonan Economico, Comercio y Industria, Santa Rosa y DIP. E meta principal ta pa traha un plan di implementacion pa stimula e produccion comercial di webo di galiña localmente.

Segun analisis di di Departamento di Asuntonan Economico, Comercio y Industria e consumo total di webo di galiña tawata 4.8 miyon unidad na 2023. Di e cantidad aki, 85 por ciento ta wordo importa y solamente 15 por ciento ta wordo produci localmente. Pues, e dependencia fuerte aki riba importacion den e mercado di webo di galiña ta ofrece oportunidadnan di crecimiento pa empresarionan local.

Ademas, un rapport realisa pa Sociaal-Economische Raad na 2020, titula “Voedselzekerheid op Aruba” a identifica algun reto cu ta stroba e desaroyo di e sector





MINISTER ENDY CROES A RICIBI E DELEGACION DI LANDAMENTO ARTISTICO CU A REPRESENTA ARUBA NA CARIFTA, PANAM CHAMPS Y JUNIOR WORLD



Diahuebs ultimo, Minister Endy Croes a ricibi e delegacion di Landamento Artistico cu a respresenta Aruba recientemente na diferente competencia internacional. E atletanan a comparti nan experiencia na CARIFTA, PanAM Champs y Junior World Championships cu e mandatario di Deporte. E seleccion a konkista 30 medaya: oro, plata y brons na CARIFTA. Den nomber di Gabinete Wever – Croes II, Minister Endy Croes a otorga e hobennan un medaya di 4D, cual ta para pa disciplina, deseo, dedicacion y determinacion.

Head Coach di Aruba Artistic Swimming Sra. Kimberly Vinck a indica cu e aña a inicia hopi bon cu e competencia preparatorio na CARIFTA cu a tuma luga na Fort Lauderdale, Florida. Despues a competi den PanAm Champs cu a tuma luga na Lima, Peru y a participa den Junior World. “Pa prome biaha Aruba a competi den un Junior World Championships, cu e meta pa e atletanan por crece y haya experiencia specialmente awo cu e deporte ta den e fase di transicion grandi. E reglanan ta cambiando y a wordo restructura. Ta hopi importante pa e atletanan sigui siña”, Sra. Vinck a enfatisa.

Por ultimo, e mandatario di Deporte ta felicita y gradici e atletanan pa nan bunita trabou y pa pone Aruba su nomber briya riba e plataforma internacional. “Masha pabien y hopi exito den futuro competencia di natacion artistico,” e mandatario di Deporte a conclui. ■



Minister Thijsen:

PROCESO DI RENOBACION DI GABINETE DI ARUBA TA CANANANDO BON, NO OPSTANTE RETRASO



Minister Plenipotenciario demisionario mr. Ady Thijsen ta desea ta ramarca cu e proceso di renobacion di e edificio di Gabinete di Minister Plenipotenciario di Aruba na Hulanda ta canando bon, no opstante di un retraso. Esaki segun e mandatario ta debi na rekesitonan nesesario den e proceso preparativo pa un proyecto asina grandi.

Sr. Thijsen ta emiti e declaracion aki debi na articulan den medianan di comunicacion na Aruba, referiendo na su entrevista cu 24Ora.com. Den e entrevista aki Minister Thijsen unicamente a bisa cu e preparacionnan ta casi cla, cu tin burocracia ta hunga un rol y cu su persona ta desea pa cuminsa cu e renobacion pa asina e edificio lo ta cla na December otro aña pa tene un re-apertura na 2026, e aña cu Aruba ta celebra 40 aña di Status Aparte. Segun e mandatario den e entrevista e lugar ta bai keda hopi netchi y ta spera cu tur cos cana bon pa e renobacion tuma lugar.

Minister Thijsen a papia den e entrevista cu e team di Gabinete di Aruba ta haciendo un bon trabao, cu un director nobo na cabes di e organisacion. Tambe sr. Thijsen a para keto na e contactonan intensivo cu Gabinete di Aruba a bin ta tene cu studiantenan Arubiano, cu segun Minister Thijsen ta e futuro

di Aruba.

Finalmente Minister Thijsen ta lamenta cu den e articulan basa riba e entrevista a hinca hechonan cu no a wordo bisa den e entrevista y alabes cu nan no tin nada di haber cu e proceso di renobacion di Gabinete di Aruba. Asina ta crea un malconcepto di su declaracion riba e tema aki den e entrevista cu 24Ora.com. ■

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM

2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

